



# Schwoweblatt Nr. 29

zammgestellt vun **Helen Alba**  
300488 Timisoara, Calea Sagului 21, sc. B, ap. 43  
Telefon: 0256-245590  
E-Mail: [albah@web.de](mailto:albah@web.de)  
[www.lenauheim.de](http://www.lenauheim.de)



## Die Großmutter domols

Wisst ihr noch, wie es domols wor?  
Die Großmutter mit gscheeteltem Hoor?  
Im Lehnstuhl am Finschter, es Strickzeich in Händ,  
Perlon hat mer domols noch nit gekennt.  
Im bauschiche Rock aus wollenem Tuch,  
vor ihr hat gelee es Bibelbuch.  
Un sin dann die Enkel kumm mied vun der Gass,  
han die gebettelt: "Och Großmutter, verzähl uns doch was!"  
Do hat se gelacht mit zahnlosem Mund  
un tut ihne die scheenschte Märchen kund.  
Sie war immer do, war voll warmer Lieb,  
hätt winsche kenne, dass es immer so blieb.  
Ja, denkt eich, Großmutter mit Häubchen im Hoor,  
so hat se betreit die Kleene vor villi Jahr.  
Sie is selten ausgang, an sich gedenkt hat se nicht,  
gekennt hat se ens – des war ihre Pflicht.  
Wer solch e Großmutter besesse,  
ich denk, der werd die niemols vergesse.  
Ich han so e Großmutter ghat, welch Glick!  
Denk noch oft voll Sehnsucht an sie zurick.  
Ja domols, do war noch die guti alti Zeit!  
Wie leit die so fern, wie leit die so weit!

## An der Marosch / Vun der Bäsl Eva Mayer

Es war doch scheen, wie mer noch jung ware, sich so vieles erlauwe hot kenne! Es war bestimmt net leicht, wann mer Samschtachs un gar oft aach Sunndachs hot arweite misse. Wann mer awer frei ware, do sein mer immer wieder ausgfloo, immer mit zwaa Autos, die sein dann vollgstoppt wore mit Kullegre un los is es gang ins Grieni, an die Marosch, an die Temesch oder an die Bega, manchmol gar noch weiter. Geere meechte mer des aach heit noch mache, awer es reicht jo nitemol fors Alltäglichi! So sein mer mol an eem Samschtach noh der Arweit losgfahr: Also, heit gehts an die Marosch. Mir hade schun unser Plätzer. Mir sein ankumm, es Zelt is ufgestellt wor, Tisch un Stiehl rausghol, die Luftmatratze ufgepumpt. Un jetzer kanns los gehn! Ab ins Wasser! Es Ufer war scheen sandich, der Sand soll jo gut sin for Rheuma. Ich hab die Matratz ins Wasser geloss, mich drufgeleet um mich treiwe zu losse. Mei Kullegre han mer noch zugeruf: Geb owacht, des is net die Bega! Des Wasser treibt dich zu gschwind! Ich dreh mich hin un her un uf amol plumps ich ins Wasser un war dorte gelee. Die Luftmatratz is gleich weiter getrieb wore un ich hab rumgezawelt bis ich wieder hoch kumm bin. Des Wasser war doch vill tiefer, als wie ich mer des vorgstellt ghat han. Die Mannsleit sein gleich dere Matratz noh un die Weibsleit han mei Kopptuch schwimme gsiehn uf dem Wasser un han zu schreie anfang: Losst doch die Matratz schwimme! Es Evi is versoff! Dorte schwimmt schun sei Kopptuch! Derweil war ich schun längscht am Ufer hiner de Streicher, die Männer han gelacht, die han mich schun gsiehn ghat. Am Owet wars erscht recht scheen, de Schreck war voriwer, mir han noch im warme Sand gelee, es Wasser hot geplätschert, die Grille han Konzert gmacht, ab un zu hot a Frosch gequackt, die Gelse han gsummt. Awer, mir han uns mit Essich ingerieb, so han se uns in Ruh gloss. Langsam han mer ans Schlofgehn gedenkt, zu fünft han mer im Zelt gelee, die anre hans sich in de Autos gemietlich gemacht. Morjets bin ich aus dem Zelt gschluppt, is doch grad die Sunn ufgang. Do hab ich die anre alli rausgstawwert, for a Sunneufgang an der Marosch zu erlewe.

Bischt närrisch! Uns in aller Herrgottsfrieh ufzustawwre!?, han die anre gschrie. Doch es hot ne net leed getun, es war a scheenes Erlebnis. Wie die Sunn immer heher gstie is, ihre Strahle immer stärker sein wore, wie des Wasser so gfunkelt hot, do wars em so andächtlich zumut. Wie hot unser Herrgott doch die Welt so scheen gmacht?! Mer hätt am liebschte noh de Strahle gegriff. A leichter Wind hot die Bääm un Streicher hin un her gewiet, es war a reines Vergniegn, all des zu schau. Die Veegl han aach ihre Konzert schun längscht anfang, es war so a Jubiliere in der Luft, dass mir ganz still ware un im Stille unsrem Herrgott for des Scheeni gedankt han. Nohder sein mer erscht ans Fruhstuckmache gang. Die Mannsleit han mer um Holz gschickt for Mittachs a Gratar mache, die Krumbiere sein ufm kleeni Aragas gebrot gin, gudi Musich war aa do. Alles in allem – es war a scheener Tach. Nor schaad, dass der Sunntach immer so gschwind rumgang is. Awer, es ware villi scheeni Täch, die mer mitnaner verbrung han. Montachs not hot uns der Alltach immer wieder in de Krallen ghat. Un heit, heit leb mer vun de Erinnerung, weil mer jo aa heit mit dem Forum aa noch scheeni Ausflieg mache kenne. Awer, es is doch nimmer des, was mol war!

### **Es Mehlspeisbuch / Vun der Bäsl Marianne Barak aus Berlin**

Es Berta is e ausgezeichneti Hausfrau. Alles is blitzblank bei ehm. Die Wäsch leit in Reih un Glied, glattich gebiegelt im Schank, die Tippe un Reindle sin uf Hochglanz poliert. Es kann wunerbar koche un himmlisch backe. Es war beriehmte im ganze Dorf weger seine gute Mehlspeisrezepte. Wann e Hochzeit, Kindstaaf oder Kerwei war, sin se immer kumm, sei Mehlspeisbuch lehne, far gute Küche backe. Es Berta war natierlich stolz uf sei dickes Mehlspeisbuch, wu`s johrelang Rezepten aus aller Welt gsammelt un ordentlich un akkurat ufgeschrieb hat. Newer seim Mann un de zwaa Kiner hat noch die Urgroßmutter bei ihne gelebt. Die war schun stark vergesslich un es Auelicht hat nimi so recht funktioniert. Es Berta hat far phaar Täch verreise misse un hat die vier ihrem Schicksal iwerloss. Wie`s zuruck kumm is, hat`s ganzi Haus ufm Kopp gstann, nix war uf seim Platz. Wie`s so richtig im Schwung war, far nochmol Ordnung schaffe, kummt sei Freindin, es Luisa. Des will es Mehlspeisbuch lehne, weil sie han Kindstaaf un do muss doch guti Mehlspeis uf de Tisch kumme. Es Berta geht an die Schublad, zieht se uf un traut seine Aue net. Es Mehlspeisbuch is net drin, un es war doch sicher, dass es uf seim Platz gelee hat, bevors fortgafahr is. "Urle," so han se die Großmutter genennt, "hätt ihr des Mehlspeisbuch aus der Schublad ghol?" "Mehlspeisbuch? Nee! Dort hat nor e Heft drin gelee, des han ich ghol un ins Klosett ghong, weil dort ke Papier me war!" Es Berta is schnell an de Unglücksort gelaaf, awer dort han nor noch phaar Blätter ghong. Es is bal schwach gen! Sei scheenes, gutes Mehlspeisbuch war far immer un ewich verlor! E Verlust fars ganzi Dorf!

### **Nix wie Schmadracks**

De Vetter Matz is ins Bad gfahr. Leenich! Er hat sei Bäsl Nantschi ganz eenfach derhem gelost! Des war nämlich so: Weil der Vetter Matz schun Rentner war, un weil ne des Ischias so aarich geploot hat, hat er vun seim Weib, des wu noch arweite hat misse, un in dem Summer ke Urlaub kriet hat, die Erlaubnis kriet, leenich ins Bad zu fahre. Die Reisetaschn war gepackt, de Vetter Matz hat gsaat, nit um die Welt fahrt er mit dem altmodische Gestell vun eem Kupfer. Un so han se halt vun de Nochberschleit e Taschka gelehnt, die wu so e langi Häng ghat hat, for malagamba iwer de Buckl traan. Un unser Schwob is, mit villi guti Rotschläch ausgerischt, abgedampft. Erscht hat die Bäsl Nantschi sich e Kaffee gekocht un beruhicht ufgschnauft: Meiner Seel! Drei Wuche Ruh im Haus! Es kummt mer gar nit zum Glaawe, dass ich jetz nor mach, was ich will un was mer Gspäß macht! Erscht hat des Weib es Haus uf de Kopp gstellt, sauwer gemacht, alles gewäscht un gebiegelt. Jetz war nimi vill zu tun un die Bäsl hat anfang, sich zu langweile. Wann se zwaamol in der Wuch gekocht hat, des hat gelangt, hie un do e Aij in die Phann schlaan un gebrodeni Krumber derzu mache, des war nit die Welt. Am e scheene Tach kummt die Bäsl Nantschi miehselich hem aus der Arweit. Schun in der Elektrisch vergspiirt se e Wolfshunger, awer gar ke Luscht, for jetz noch uf de Mark gehn inkaafe un sich etwas koche. An so eem Ecke war e Bude, wu mer sich allerhand neimodisches Esse kaafe kann. Sie schaut uf die Lischt: Hamburger, Tschiesburger..... un aach Hot-dog mit Rindsfleisch. Des Weib in der Bude hantiert rum, schneid e Semmel in der Mitt dorch, froot ob se aach Muschdei nintun soll. Die Bäsl gsieht wie die Verkeiferin die dick gfillti Semmel noch in die Mikrowelle tut, dernoh inpackt, un je hem dermit, sitzt sich gemietlich an de Kichetisch. Dereweil war des alles vun der Hitz un dem Schmadracks, was drin war, gewaicht un hat gar nit appetittlich ausgshaft. So schnell verwend mer sich gar nit, bis der Schmadracks im Müll geland is. Un die Bäsl Nantschi hat sich scheen mit dem verkeschticht, was se noch in der Speis un im Eiskaschte zammgerafft hat! Eemol un nie wieder Dog-Hot oder Hot-Dog – hat unser Bäsl sich vorghol!